



NAMIBIA UNIVERSITY  
OF SCIENCE AND TECHNOLOGY

# Erara lefimaneko

Meekulu Martha Mwadinomho ya Kristian  
Nelumbu (Ohamba yOvakwanyama)



**OSHIPOIWA SHETUMBALEKO LOILONGAPONDOLI  
MOSHILO SHOKUYANDJA**

**Onghatu yEfimaneko,  
Oundokotola wOufilosofi mOuwiliki  
nomOkukwatelakomesho omalunduluko**

*[Onghatu yEfimaneko]*

**Ku Meekulu Martha Mwadinomho ya Kristian Nelumbu  
(Ohamba yOvakwanyama)**

Oshipopiwa shetumbaleko loilongapondoli

**kOmuprofesoli Efigenia Semente**  
*Omukulunhu wOshikandjo: Oshikandjo shOipindi,  
Onghalafano yopaNhu nEhongo*

**03 Kayookoilya ya yooka okupya 2024**  
Eenhana, Ohangwena Namibia





# OMAPOPIFO

- Omuwiliki woshivilo, Mm Kadiva Hamutumwa, Oshilyo shOlaata shopakafimbo na-Tt, Fillemon Nangolo, Omuwiliki wopedu mukulu mOuminisitili wEhongo, Ounghulungu nOmifyuululwakalo,
- Omufimanekwa, Omundokotola Hifikepunye Pohamba, Omupresitende mukulu naKayoo kOshitai sha-NUST mEenhana,
- Omufimanekwa Omundokotola lita Kandjii-Murangi, Ominista yEhongo lopOmbada, Ounongononi wOmashina nOmikalo dipe,
- Omufimanekwa, Ndjayi Sebastian Ndeitunga (Ngoloneya wOshitukulwa shaHangwena),
- Omufimanekwa Walde Ndevashiya – Ngoloneya mukulu wOshitukulwa shaHangwena,
- Omufimanekwa Omuprofesoli Peter Katjavivi, Omuwiliki woshiputudilo NUST,
- Omundokotola Leake Hangala, Omunashipundi wOlaata yopakafimbo ya-NUST,
- Eeminista ovafimanekwa noilyo yomutumba wopaShiwana oifimanekwa,
- Eengoloneya ovafimanekwa novawiliki vopamufyuululwakalo,
- Meekulu Martha Mwadinomho yaKristian Nelumbu, Ohamba yOvakwanyama,
- Ovawiliki veendodo dopashiwana nodopaitukulwa,
- Ovafimanekwa Ovakalelipo voilongo,
- Omufita Lazarus Akwaake, wOngeleka yedina: Reformed Evangelical, Anglican Church of Namibia,
- Oilyo yOlaata yOuniversiti,
- Oilyo yEwilikongudu lopombada IOuniversiti,
- Tate Dionisius Mumbaba Ndeilenga, Omupresitende wopedu wOlaata yOvakalelipo vOvahongwa mOshitai shomEenhana
- Ovaenda ovafimanekwa,
- Ovanailonga va-NUST ovo mu li apa
- Ovadali novatekuli,
- Oonakupewa eedjapo ovaholike,
- Ovatoolinghundana,
- Oomeme nootate.



# TATEKULU OMUFIMANEKWA, OMUWILIKI WOSHIPUTUDILO

Ondi udite etumbo neenghono e shi nda pewa omhito yokulesha oshipopiwa eshi shoupendafule sheyandjo longhatu youndokotola wefimaneko yedina Doctorate Honoris Causa, kuumwe womovawiliki va fimana nova denga mbada, omuwiliki wopamufyuululwakalo a tumbula neenghono muNamibia oo Ewilikongudu louniversiti yedina Namibia University of Science and Technology(NUST) ola tala sha yuka nosha wapala oku mu pa efimaneko lopombapada lopauhongelwe. Nakupewa efimano li li ngaho oye Ohamba yOvakwanyama, Meekulu Martha Mwadinomho yaKristian Nelumbu oo oilonga oyo a pondola mouwiliki i shivike nokokadila. NUST oku udite etumba neenghono okukala e li mekwatafano naMeekulu ou. Oku li yandjela kwaye oshiwana newiliko laye oya pandika neenghono. Mewiliko laye oonyuni wonena owa taalelwa komaupyakadi e likita, omashongo a kuma exumokomesho ngaashi oluhepo, omhumbwe yoikulya, oiponga yopaushitwe, okuhafikapamwe pokati koomeme nootate nomahupilo taa tengauka neenghono okutumbula po ashike imwe; ovanhu ovo have liyandjele oshiwana otava monika komufipa weisho, onghee osha pumbiwa okuyandja efimaneko eli.

## 1. ETWALEMO

**Tatekulu omuwiliki woshiputudilo omufimanekwa**, ouniversiti yedina the Namibia University of Sciences and Technology, ngaashi naanaa eeuniversiti dikwao mounyuni oi na omukalo wokuyandja oundokotola wefimaneko wokufimaneka ovanhu ovo va longa oilonga ya fimana neenghono mokuyakula oshiwana. Ongomunhu omulaadi mokuyambidida ehongo neenghono, Meekulu Martha Mwadinomho yaKristian Nelumbu oye Omunamibia a shivika nawa, omukainhu omulixupipiki, e na ewiliko londjungu nola nuka po noku na ohole noshiwana shaye.

## 2. EPUTUKO

**Meekulu Martha Mwadinomho ya Kristian Nelumbu, Ohamba** yaUkwanyama okwa dja mepata lEehamba daUkwanyama a dalelwa momukunda Efidi moutokelo wOndjiva moAngola, a dalwa momafiku a-7 Epembalakula 1931. Ina oNekoto yaShangeya omonakadona waNahango yaMboliooli. Kepata Meekulu Omukwanangobe nokolupale Omukwaudimbe. Okwa kala mOongo efimbo lixupi lela osheshi, ina mumwaina waina Kalinasho yaNdeiweda, Ohamba

yokOshihambo, omutekulu waMandume okwe mu kufa po mangha a li ashike okanona kanini.

Ashike, oko ina kala ko efimbo lile, okwa kala ko ashike eedula omulongo lwaapo, ye ina mumwaina waina ota mana oweenda waye. Konima eshi ina mumwaina waina a mana oweenda waye, okwa li a tekulwa kuVilho yaWeyulu, xekulu oo e mu eta moNamibia mOhaingu omo a putukila. Meekulu ota hokolola kutya mOhaingu okwe ya mo pefimbo IOita Oitivali yOunyuni nopefimbo opo oya li hai ufanwa oita yaHitler (shiiimba peedula 1940).

Fimbo a li mushona e li mOhaingu okwa li ha longo oilonga yomeumbo oyo ya li ya nuninwa oukadona vopefimbo lavo. Oilonga ei oya li ngaashi okutwa oilya, okuwapaleka, okutyava oikuni nosho tuu. Shaashi ye okwa li a dja mepata leehamba, kakwa li a fininikwa okulonga oilonga oyo. Okwa li ha longo ashike oilonga pahalo laye mwene nonande xekulu Tatekulu Weyulu okwa li ina hala nandenande a longe oilonga oyo nokwe mu indika neenghono aha longe oilonga ya tya ngaho.

Nonande pamufyuululwakalo nopaenghulunghedi defimbo olo kakwa li kwa fimanekwa ehongo, Meekulu Martha Mwadinomho okwa kendabala okuya kofikola. Okwa li omuhongwa pofikola yopedu pOhaingu opo a mana oSub A noSub B(oyo paama hai ufanwa ondodo 1 nondodo 2) nomuhongi waye okwa li Mateus Shikeva. Okwa twikila ostanda 1 no-2 oyo paama haku ti ondodo 3 nondodo 4 odo kwa li hadi longwa kuTimoteus Ndilula. Pefimbo olo onunona vahapu ovo okwa li va hala okuninga Ovakelefiti ova mana eetundi deshasho nodekoleko meongalo longeleka oyo kwa li hai ufanwa Evangelical Lutheran Ovambo- Kavango Church (ELOC) odo kwa li tadi wilikwa kuMika Hiyoonyane. Okwa li a shashwa nokukolekwa kOmufita Ismael Nhinda. Okwe lihongela eetundi adishe pOseminali pEngela, Omisioni yEhanganotumo IOvasuomi i li moshitukulwa shaHangwena. Okwa li omukwaneongalo weongalo laNgela ndee konima okwa tembukila kOkambebe keongalo longeleki Onghwaevangeli paLuther noku li oshilyo sheongalo olo fiyo onena.

Meekulu Martha Mwadinomho fimbo a li okanona ka li ashike ha endafana novanhu vomepata leehamba ndee okwa kala e na ookaume vahapu noomakula vaye ovo ta dimbulukwa. Nonande ookaume kaye noomakula ova ninga vahapu neenghono noitava dulu va tumbulwe aveshe komadina mondjokonona ei, okwa tumbula po vamwe ngaashi Anna yaJohannes yaNdjaula, Mundowishi Teopolina yaFrans yaHaipumbu naPaula yaFrans Haipumbu.

Eshi a kula, Meekulu Martha Mwadinomho okwa valekwa ndee ta hombolwa komumati waye, Aron Sheehama. Paenghulunghedi dOshiwambo omukulukadi oha fiye po eumbo lavo ndee ta i a ka kale keumbo nokomukunda oko kwa

dja omushamane waye. Onghee molwonghalo ya tya ngaha, Meekulu Mwadinomho okwa tembukila kOkambebe e shi a hombolwa. Mohombo yavo ova pewa ounona va-8(oumati vaheyali nokakadona kamwe). Mupyanene pounona ava va-8, vatatu aveke ve li momwenyo novo nee Jona Sheehama, Vilho Sheehama nonghelo Titus Sheehama.

### 3. MEEKULU OHAMBA YOVAKWANYAMA

Mokuhokolola eedula dekondjelomanguluko laNamibia, **Meekulu Martha Mwadinomho yaKristian** okwa kala noku li omukalimo womOkambebe moshikandjohoololo shaNgenga. Okambebe nOngenga omikunda odo da kala ouholameno wovakwaita vetanga lokakulumbwati hali xupipikwa nedina PLAN (People Liberation Army of Namibia). Pefimbo olo ovakalimo vomomikunda edi okwa li va shiivika kutya ova li lela tava kondjifa enangalo laNamibia kuSouth Africa puhe na edimbuko.

Nande ye mwene ina kala momalwoodi oo vene ekondjelomanguluko, ngaashi ngoo ovakainhu vakwao vomOkambebe, Meekulu okwa kala a djuulukwa lela Emanguluko laNamibia. Okwa yambidida ovakwaita vekondjelomanguluko/ Etanga lOkakumbwati lEkondjelomanguluko laNamibia, Etanga lopakwaita la-SWAPO, e shi a yandja oikulya, omulele, oikutu naapa tashi dulika okwe va pa yo oimaliwa.

Pamwe novanhu vamwe okwa hakula ovakwaita ovo va li va ehamekwa momalwoodi nomafimbo amwe okwa holeka oilwifo yavo, pamukalo ou okwa li te likokele lela ondjadjo nomafundju eshi ta ningi ngaho.

Shikwao, Meekulu okwa li umwe womwaava va tota po eengudu domailikano dokuilikanena eameno nouwa wOvanamibia ovo va li moupongekwa; tava ilikanene ombili nemanguluko laNamibia nosho yo exulifepo lomahepeko oo kwa li taa etwa ketanga laSouth Africa. Meekulu okwa kondjifa omahepeko ehe na edimbuko oo kwa li taa ningilwa ovanhu kEtanga lOkufuta (Koevoet) nokEtanga loPashitukulwa lomuSouth West Afrika (SWATF) nokwa palamena omahepeko pamukalo keshe ta dulu nopo e li nena ta hokolola ehokololo laasho sha ningwa po. Okuhatonyala kwaye pefimbo lidjuu lekondjelomanguluko laNamibia okwa kwafela neenghono mokuxumifa komesho eenghendabala adishe dokumangulula Namibia.

Ondjokonona yOhamba Meekulu Mwadinomho oya kwatafana lelalela nependulopo louhamba wopoMhedi konima yeedula 79 eshi Ovakwanyama va kala vehe na Ohamba eshi Ohamba Mandume yaNdemufayo ya xulifa momudo

1917. Meenghandabala da mana mo dokupendula po elelo lopamufyuululwakalo, Omunashipundi kwa li wElelo lopaMufyuululwakalo, Gabriel Kautwima okwa dja mo meumbo laye pOmhedi omangha ina xulifa momudo 1995. Eshi osha ningwa opo ku yandjwe onhele yolukalwa lohamba ipe yOvakwanyama oo tai hoololwa. Ehokololo otali ti konima eshi oshilongo sha manguluka, Ovakwanyama ova hovela okukonga epata leehamba opo va hoolole omuwiliki mupe. Omufita Natnael Shinana navakwawo ova mona nakufya Cornelius Mwetupunga Shelungu a dja mepata leehamba. Okwa nangekwa a ninge Ohamba yOvakwanyama momudo 1998. Ohamba Shelungu e shi ya xulifa, muShikukutu momudo 2005, Ohamba Meekulu Mwadinomho, omutekulu wOhamba Shelungu a dja modikwa oyo tuu oyo yeehamba okwa nangekwa momafiku 12 aShikukutu 2005. Euliko laye ongOhamba yOvakwanyama inali kondjifwa nande okomunhu osheshi ola ningwa pahalo laxekulu nakufya Mwetupunga Shelungu.

Osha fimana okutumbula kutya Ovakwanyama kave na fiku va lelwe kOhamba omukainhu onghee Meekulu Mwadinomho oye omukainhu wotete ta lele nota pangele ongOhamba yelelo lopamufyuululwakalo olo li na oikandjo 12, omadiko 59 nomikunda 607. Nonande omwali Eehamba eenghainhu momufyuululwakalo wOvakwanyama, kape na oo a pangela. Onghee Ohamba Mwadinomho otai yandje omhito yokuya meemhata kombinga youkakwashikekookanhu, elelo nelunduluko olo tali ingaana pokati komufyuululwakalo noshinanena oku shi talela momalunduluko oo a ningwa melelo lopamufyuululwakalo lOvakwanyama olo tali kwatelwa komesho komukainhu.

#### 4. OUFIYE NONDUNGEFANEKO YOHAMBA MEEKULU MARTHA MWADINOMHO YAKRISTIAN NELUMBU

Kombinga yohole yoshiwana, **Ohamba Meekulu Martha Mwadinomho** oya yandja oshihopenanwa shiwa kOvakwanyama aveshe nosho yo palwe osheshi ohai tu ovanhu omukumo va yakule, ve liyambe nova kale ovakwashiwana va nuka po. Moule weedula needula omolweyambidido nomalombwelo aye, Ouhamba wOmhedi ohau file oshisho ounona va konda 45 ovo vehe na ovafilishisho novakulunhu 27 ovo vehe na omaumbo. Okwa ninga eindilo la mana mo mEtalalalinini 2015 e li yukifa kovakainhu ovanyasha aveshe muNamibia vaha kufe mo omadimo shihe li paveta, novaha dipae eehanana ile ve di kupuleshi ndele nee ve ete eehanana odo kOuhamba. Oshikwao Meekulu okwe shi pondola okutota po oshikunino mOmhedi opo a file oshisho eefiye nounona ovo vehe na ovafilishisho e va file oshisho mOuhamba nosho yo ounona vomomodongonoko wopopepi. Oshikunino ohashi tambula ounona veedula

okudja pu-4 fiyo opu-6 noshi na paife ounona ve li 41 va dja mOuhamba naava va dja momudingonoko wopopepi. Meekulu ota ka fiya po lela oufiye wokuhelihola nowokuyakula ovaletwa vaye, Ovakwanyama.

Shikwao vali Ohamba Meekulu Martha Mwadinomho omunhu e shivike lela mokukondjela ovanayasa. Ongoumbangi ofikola Mwadinomho Combined School yi li momukunda Ondeihaluka yi li eekilometa 30 koumbanganhu waNdangwa oye mu lukilwa momudo 2007 omolwoilonga yaye inene oyo a longa mehongo lovanyasha noku va pameka. Ovakwashiwana ova li ve udite kutya Edina Ondeihaluka ola li po ashike shaango li li po noitali ti sha kwaasho ovanhu va hala ovo va li ve wete kutya Edina lofikola nali holole oukumwe wOvakwanyama. Onghee opo ku fimanekwe Ohamba Meekulu Mwadinomho oo e na enwefemo moshiwana nomElelo lopamufyuululwakalo lOvakwanyama, ofikola oya lukululwa. Eshi otashi holola osho ovakwashiwana va itavela nefimaneko lavo okufimaneka Ohamba yavo nelelo lavo lopamufyuululwakalo. Ofikola oyo Mwadinomho Combined School oi na ovahongwa ve li 739 noyo imwe yomoiputudilohongo hayi shi endifa nawa neenghono moshitukulwa shaHangwena hai shi endifa nawa neenghono moku li hongwa, mouwiliki, momaudano nomomifyuululwakalo.





Omafimbo a dja ko, e shi a mona kutya opu na omhumbwe ovanhu vaye va pewe ehongo lopombada longushu, Meekulu Mwadinomho okwa li a kwatele komesho osheendo sha pama sha yuka kOvenduka, omo mu na oshipundi sha kula shepangelo laNamibia. Owa li e udite kutya ovanhasha okwa li tava mono oixuna osheshi vahapu kava li tava dulu okuya ve ke li honge kOvenduka. Okwa koleke kutya Owenduka oi li kokule novanhasha nokave na apa tava kala ngeenge tava twikile omalihongo avo. Onghee tete okwa pula epitikilo koshiwana shaye. Nomolwashi momudo 2016 pombelewa yoshilongo pOhangwena okwa holola omhumbwe yoshiputudilo shopombada mOhangwena. Ovanhu moshongalele ove mu pa eenghono a ye a ka mone Omutwe wEpangelo kombinga yosheetwapo eshi.

Opo ku iwe komesho nosheetwapo eshi, okwa totwa okakomitiye kokukwatela komesho ondugefaneke ei nomunashipundi wako okwa li nakufya Ambasada Hadino Hishongwa naJosia Udjombala oye a li hamushanga. Apa okwa tumbulwa ashike oilyo imwepo. MuKayoo koilya yooka poipale momudo 2016, Meekulu nosheendo shaye ova monafana nOmupresitende. Momhito ya shikula ko muTaula momudo 2017 Ominista yEhongo lopoMbada Omundohotola lita-Kandji Murangi okwa kundafana nosheendo shaMeekulu. Minista okwa yandja efaneko kosheendo opo ku totwe oshitai shoUniversiti ndele hauniversiti ompe mOhangwena. Ediladilo eli ola li la tambulwa ko osheshi eshi Meekulu a li a hala osho oshiputudilohongo shopombada shi ehenifwe popepi novanhu. Kuye kutya opa etwa oshiputudilo shipe ile oshitai shipe shoshiputudilo osho shi li po nale oshiwa ashike. Eshi osho sha li edalo loshitai shedina The Eenhana Satellite Campus of the Namibia University of Science and Technology (NUST). Sha landula ko Ominista Omufimanekwa Omundohotola Kandji Murangi okwa ulika Omufimanekwa, Omupresitende mukulu Omundohotola Hifikepunye Pohamba opo a ninge Kayoo kOshitai shOuniversiti osho tashi ka patuluka diva moshitukulwa shaHangwena.

Eshi oshitai sha-NUST sha dikwa mEenhana, ehalo laMeekulu la kula olo Oshitai eshi shi koke, shi ninge shinene noshi yandje eyakulo lopahongo kovanhu vomomikunda nomoitukulwa imwe moshilongo opo ovanhu vokomikunda va mone omhito yokumona ehongo lopombada longushu. Okwa hala nokuhalelela oshitai sha-NUST shi twikile nokuxuma komesho noshiha yandje ashike ehongo longushu ndelenee shi yandje ehongo olo tali nyamakula eemhumbwe dovanhu nexumokomesho lavo.

## 5. OMHUMBWE YEWILIKO

Omunhu ina pumbwa ngeno okukonga oishangomwa ile nomilandu dopashiwana odo tadi ti omikundu dimwe oda kula neenghono okukandulwa kepangelo olo alike noda mbwalagandja neenghono nohadi lunduluka neenghono opo di udike ko tashi pitile momashitililokonakono oo a kala ko nale (Head, 2022). Naime (2020) naTermeer, Dewulf naBiesbroek (2019) otava mbangipaleke kutya edi "Omikundu di ngulukila"; omangha Shantz navakwao (2023) tave di ifana "Omikundu da pumbwa eudeko lomoule ile lipe," osheshi otadi holola eendodo da ya pombada da kitakana, tadi limbilike nodaxwaanana. Eudeko eli otali holola kutya ope na ovakufimbinga vahapu tava kondjakana nomikundu edi odo tadi ulike oilonga noinakuwanifwa ya yoolokafana, omifika deshiivo da yoolokafana, omateelelo a yoolokafana ovakufimbinga, eehokwe da yoolokafana, eenghedi nomakanghameno a yoolokafana oo taa eta omalipumomumwe naluhapu otaa eta omakundulepo omikundu oo a halika taa kondjifafana (Head, 2022). Oihopaenwa oyo tai hangika momishangwa domafimbo a dja ko yamatutu oyo ya kwatela mo elundululuko longhalo yomhepo, omalipumomumwe ehe na edimbuko ile ahali ka sha hali ka toka, oufyoona, ondjala, omhumbwe yomeva, oyuyuyo yomalumba, endumbalalo lovanhu moilando, ehalo loipumbiwa ya dja moinima yopawushitwe, ompumbwe yefiloshisho lopaundjolowe, eemhito dihe fike pamwe dehongo noukoshoki inaa henena oyo imwe yomomikundu dihapu di kenyaneka nodi lulila odo tadi piyaaneke engungumano nosho yo okukala nawa mOunyuni efimbo lile (Termeer, Dewulf, & Biesbroek, 2019). Pamakanghameno omikundu edi oda koyelela notadi kumu/tikitile omukangha keshe womikalo domashitililokonakono a dindwa okuninga omalongekido nomilandu, omukalo umwe u lili wokukandula po omikundu di ngulukila owo okulinyika komilungu novakufimbinga nokukundafana navo (Head, 2022). Pakutala, okulinyika komilungu newiliko la nuka po oya eta omakandulopo omikundu mawa omolwekufombinga lovanashisho la kwata moiti nokukundafana omikundu edi nosho yo okukwatela mo eengudu odo da kala da patelwa pondje mokukundafana omilandu delelo (Janeczko, 2011). Momukokomoko wefimbo opa holoka omikalo dokulela da yooloka ongomikalo dokuudako, okukwatakanifa nokukondjakana "nOmikundu di ngulukila", hop. Elelo le likolelela komakwatafano oshinanena, (Van Bueren, Klijn, & Koppenjan, 2003), elelo lovanhu ve limanga kumwe (Roberts, 2000), elelo tali tambula ko omalunduluko (Gunderson & Light, 2006) ile elelo tali longele kumwe noshiwana (Torfing, Peters, Pierre, & Sorensen, 2012) okutumbula po owala oihopaenwa ishona. Omikundu di ngulukila ngaashi naanaa da shivika paukwatya wado oda pumbwa omunhu te likanyuna eenghono dopaumwene ndee ta yandje

eenghono koshiwana shi longele kumwe naye osheshi omikundu edi oda pumwa ekufombinga lovanhu aveshe. Sha hala kutya meenghalo omo pu na omukundu ungunlukila, wa kitakana neenghono, tawu limbilike neenghono nowa xwaanana, oinima ei otai dulu ashike okukandulwa po luhapu kelelo olo la nuka po. Oshilonga sha fimana shewiliko mokukondjakana nomikundu dingulukila osho oumbangi kutya ewiliko kali fi ounongononi ndele ounghulungu- olo ounghlungu ile ounyakwa wokulinyika komilungu noshiwana nokukwatakanifa eenghedabala doshiwana mokutaalela omikundu da kitakana, da yooloka nodi limbilika. Ohamba Meekulu Martha Mwadinomho yaKristian yaNelumbu oya holola filufilu eenghama dayo dokuwilika mokukondjakana "nOmikundu dimwe da pumbwa omadiladilo a ya moule ile mape domounyuni wonena.

## **6. OSHILONGA SHOMALELO OPAMUFYUULULWAKALO MOKULELA NOKUKALEKA PO OMAXUPILO E LI HWEPO MONAMIBIA.**

Elelo lopamufyuululwakalo oli li natango oshinima sha fimana muAfrika nena (Ubink, 2008). Moilongo ei ihapu, ewiliko lopamufyuululwakalo oli na oshilonga mokukalekapo onghalakamwenyo yovalelwa vavo moitukulwa nonande omitungilo domapangelo oshinanena otadi endeke pamwe nomalelo opamufyuululwakalo (Wig, 2016). Pakutala ependulopo lOmalelo opamufyuululwakalo ile Omauhamba muAfrika oya kwafelwa konghalo oyo kutya omitungilo dipe dovaleli opamufyuululwakalo oda fa da holoka momapangelo mahapu muAfrika eshi kwa tulwa po oudemokoli weengudu dopapolotika dihapu, okuyandja eenghono delelo koitukulwa, netukuluko leamo tali ulike epangelo ongomukufimbinga momalelo oounyuni oo tae li manga kumwe neenghono nokwa kitakana. Monghalo ya fa oyo ya tumbulwa metetekelo, omilandu da manguluka mokupindikafana mounyuni domeedula 1990 noukaume momapendulepo oshiwana oyo tai pula omalunduluko omitungilo domalelo, tayi denge omufindo pu kale elelo linini, okushunifa pedu elongifo loimaliwa yepangelo, okunghonopeka ovakwashiwana nokukonga omukalo u lili wokukandula po omukundu, oya eta po eemhito opo omalelo opamufyuululwakalo a kufe ombinga mokutula eemhangano moilonga, mokupatukununa eenhamanana, mokuyandja omayakulo-nokutula moilonga eeproyeka domaxumifokomesho oshiwana (Baldwin & Holzinger, 2019). Onghee okudja meedula do-1990 omapangelo mahapu omuAfrika, omahangano opaiwana nomahangano okuyandja eeshali nomikuli komapangelo okwa holola ohokwe ipe mOmalelo opamufyuululwakalo ile mOmauhamba. Eshi osha eta oilongo yomuAfrika ihapu i pameke ile i

tambule ko pambelewa oilonga yovawiliki vopamufyuululwakalo nomalelo opamufyuululwakalo(Ubink, 2008).

Yimwe yominakuwanifwa yomalelo opamufyuululwakalo okuyandja omayekelelo kepangelo lopokati nokukufa ombinga mokulela oitukulwa noikandjo(Addadzi-Koom, Addaney & Nkansah, 2022). Ongedidiliko loukumwe mOshiwana shaGhana, ovawiliki vopamufyuululwakalo pafinamhango ova indikwa va kufe ombinga meengudu dopapolitika. Kakele koilonga yopafinamhango oyo ya tumbulwa, ovawiliki vopamufyuululwakalo muGhana ove na oshinakuwanifwa shokukwafela ovakwashiwana va kale monghalo i li xwepo nokukwafela ovakwashiwana voshilongo shavo. Nena, omuwiliki wopamufyuululwakalo ile elelo lopamufyuululwakalo ola teelelwa li kwatele komesho ovanhu valo mokuunganeka oinyangadalwa neeproyeka dokulikwafa nokueta po omadiladilo okutotapo oiputudilo neepoloholama dokutula onkalo yovalelwa vavo pomufika u li hwepo moimhungu ngaashi okuxumifa komesho ouhaku, elongo, oipindi, omaxupilo ile onghalafano. Ashike shaashi omalelo opamufyuululwakalo novawiliki opamufyuululwakalo okwa kufwa eenghono dopapolitika neenghono da shiya ko mokulela nokave na omayambidido opaimaliwa pambelewa, omalelo opamufyuululwakalo novawiliki vopamufyuululwakalo ohava kandula po omikundu edi dopetindi dovalelwa vavo tava longifa oonyakwa, eendunge domoule, oulaadi nomafimbo amwe ohava longifa omaliko avo opaumwene. Osho shi shi okukonekiwa osho sho kutya oiputudilo neepoloholama edi inadi teelelwa di pingene po edi da tulwa kepangelo lopokati nokomapangelo opaitukulwa, ashike otadi vatele osho sha tulwa po kepangelo naunene tuu mefimbo e li eshi eemhumbwe dovanhu da ninga dihapu noda yooloka naashika otashi kala shidjuu kepangelo lopokati opo li kandule po eemhumbwe adishe odo noiyakulifo yalo. Onghee ovawiliki vopamufyuululwakalo ile Omalelo opaMufyuululwakalo ohaa dulu nohaa dana onghandangala yakula momaxumifokomesho naashi otashi pameke oudemokoli nokukaleka po elelo liwa.

Oku shi talela monghalo i li ngaha Ohamba Meekulu Martha Mwadinomho oye oshihopaenenwa shiwa kOvakwanyama aveshe nokovanhu ovo tava hangika moiwana imwe osheshi ota tu ovanhu omukumo va yakule oshiwana, ve liyambe nokukala ovakwashiwana va nuka po, oinima oyo tai tu kumwe filufilu noshinakuwanifwa shelelo laye. Oshihopaenenwa, moule weedula needula molwewiliko laye neyambidido laye Uhamba wopoMhedi owa fila oshisho onunona vehe na ovafilishisho va konda 45 nokwa filwa oshisho ovakulunhu vehe na omaumbo ve li 27. Oyo yimwe ashike yomoilonga ya tya ngaho oyo a longa.

Epangelo loRepublika yaNambia ola tula moilonga Oveta yOmalelo opaMufyuululwakalo momudo 2000 osheshi omalelo opamufyuululwakalo otaa dana onghandangala ya kula moshilongo. Oveta ei otai ufa oinima imwe ngaashi okunangeka, okuhoolola, okutambulako, oilonga, oinakuwanifwa neenghono dOmalelo opaMufyuululwakalo novawaliki opamufyuululwakalo noitwa ya dalwa koitwa ya fimana nayo oya kwatelwa mo (GRN, 2000). Oveta yOmalelo opaMufyuululwakalo oyo onghendabala muNamibia yokuyandja eenghono komalelo opamufyuululwakalo opo ku amenwe omaxupilo opaitukulwa needjo. Oshihopaenenwa, okudja mefimbo loukoloni, Omudingokonoko waNamibia needjo dopaushitwe odo di li eliko lopamuhanga oda kala da amenwa neenghono kOveta yopaMufyuululwakalo. Namibia e shi la manguluka, epangelo ola pewa oshinakuwanifwa kOkatendo 95(1) kEfinamhango laNamibia opo li dute po omukanghaveta tau wapalele wokuamena omudingonoko nokutwa ovanhu omukumo va longife eedjo dopaushitwe noundalapata. Pamukalo ou oinakuwanifwa yOmalelo opaMufyuululwakalo yokushakenifa oilalakanenwa ei oya dewa mo nawa momukanghalandula wopaveta yaNamibia oo tau popi kombinga yOmalelo opaMufyuululwakalo noufemba wovalongifi vedu laaveshe.

PaVeta yOmalelo opaMufyuululwakalo, ongoshihopanenwa, Omalelo opaMufyuululwakalo okwa pumbwa okupitika ovakwashiwana va longife eedjo dopaushitwe noundalapata nopamukalo oo tau kwatele po oushitwe neshito omolwouwa wovanhu aveshe. Kakele kaasho, Oveta yOmalelo opaMufyuululwakalo oya yandja eenghono kOmalelo opaMufyuululwakalo a yambidide Etanga lOpolifi laNamibia nomahangano makwao oo haa paka eeveta moilonga meenghendabala davo dokukeelela nokukonakona oimbuluma. Eshi osha kwatela mo okuyambidida Opolifi yaNamibia mokukonakona oimbuluma i na sha noushitwe ngaashi okuteta omiti domoshilongo odo daa amenwa ngaashi omupapa nomusii nenge okudipaa eemhanda neendjaba.

Kakele kaasho, opu na omaufo taa amene eendjila oitalamimeva, omakuti nelongifo lelova, omamanya, oiti nomeva medu laaveshe. PaVeta yEtendululo yEdu laaveshe onhi-5 yomomudo 2002 Eufo 33, ondjila ile ondjila ya tavakana eenhele di li mbali oyo ya pita medu laaveshe itai dulu okulundululwa ile i patwe kakele ngeenge osha pitikwa paveta. Vali kapu na omunhu e na oufemba wokupata ondjila oyo ya yuka kondungu ile komufima oo hau longifwa kovanhu aveshe u li monhele yaaveshe ile ta keelele ovanhu va longife oshitalamimeva omo hamu xwiililwa oimuna nohamu longelwa oilonga imwe ihapu.

Mekwatafano naasho sha hokololwa pombada, Omalelo opaMufyuululwakalo, okwa pewa oshinakuwanifwa pafinamhango shokuamena omudingonoko

waNamibia nokufila oshisho elongifo leedjo dopaushitwe odo di li medu laaveshe. Pamukalo wa tya ngaha, Omalelo opaMufyuuluwakalo oo omesho nomatwi epangelo pandodo yopaitukulwa nohaa dana onghandangala ya fimana mokuyambidida epangelo mokutula moilonga eeveta dalo. Nonando oongaho osho sha fimana unene osho sho kutya lomalelo oku na oshinakuwanifwa sha kula shokufya oshisho opo ovanhu vavo va mone omauwa meedjo odo di li momidingokono davo. Efimaneko netulomoilonga lomakanghameno yokuwilika eedjo dopaushitwe noundalapata moitukulwa yaaveshe omo omalelo opamufyuuluwakalo e na eenghono olo oshinima sha fimana mokuhanga oshilalakenenwa eshi.

## 7. NAMIBIA OKWA MONA EMANGULUKO ESHI OOHANDIMWE VE LIDIPAELA PO NGAASHI MEEKULU

Meekulu Mwadinomho Martha Kristian yaNelumbu ngaashi naanaa ovakainhu vamwe vomoubungalanhu waNamibia ova longa shomunguda mokukondjela emanguluko laNamibia eshi va kwafa Etanga lOkakulumbwati laNamibia eshi va pa ovakwaita vokakulumbwati oipumbiwa yopetindi -ngaashi oikulya, omeva nomulalo noku va shivifila ngeenge omutondi omo a li momudingonoko.

Omukunda Omhedi omo mwa kala Meekulu Mwadinomho Martha yaKristian yaNelumbu owa hovela nekwateko louhamba kuPortugal naSouth Africa pefimbo lOita yOtete yOunyuni oyo ya etifa etembukilo louhamba koumbuwanhu woshitukulwa osho paama sha tukulwa keengaba dopaiwana pokati kaNamibia naAngola. Okudja momudo 1915 ouhamba waUkwanyama oo wa li po mangha oukoloni inaa uya owa kwafela neenghono mokweeta



emanguluko laNamibia(Shiweda,2011). Ouhamba owa hanaunwa po nopa totwa Olaata yOmalenga ponhele yawo konima eshi ohamba oyo ya li ko ya li tai kondjifa ovayelani. Elenga limwe la fimana, Ndjukuma, olo la ninga elenga ekulunhu la yelwa neenghono adishe inaashi monika mo nale kepangelo loukoloni. Omukunda Omhedi owa li wa tofwa mo u kale onhéle yokuungaunga noikwaveta.

## **8. OHAMBA MEEKULU MARTHA MWADINOMHO YAKRISTIAN NELUMBU NOILALAKNENWA YOKUKALEKA OVANHU MONGHALO I LI XWEP0**

Efaneko lOiwana yaHangana lomudo 2030 lOnghalo i li xwepo olo li na Oilalakanenwa yOkukaleka Ovanhu mOnghalo I li Xwepo i li 17 noishonekwa i li 169 ola tula po ondugefaneke yokukaleka ovanhu monghalo i li xwepo mounyuni ya kwatela mo lela oinima itatu ngaashi omaxupilo, onghalafano nomudingonoko (UN, 2018). Oilalakanenwa yOkukaleka Ovanhu mOnghalo i li Xwepo, onghendabala yokukandula po “Omukundu dingulukila” mounyuni, oya kalela po etwokumweudafano lopaiwana la kwata moiti lokuxulifa po oluhepo noipambe yalo aishe notai eta po oounyuni wu na oufikepamwe, ouyuuki neameno – lovanhu, noudjeko (Pérez-Escamilla, 2017). Oshitwa shopokati shOilalakanenwa yOkukaleka Ovanhu mOnghalo I li Xwepo osho eudaneke kutya kapu na ou ta fyaala po naashika otashi tu kumwe neengudi nhatu da fimana dEfaneko lEkaleko lOvanhu mOnghalo I li nawa lomudo 2030 odo tadi kondjifwa: oluhepo, okuhena nhondo nokuhafikepamwe(Sachs, et al, 2022). Oluhepo alushe olo oshitwa sha fimana mEfaneko lipe, nolo la kala oshitwa sha fimana mOilalakanenwa yOkukaleka Ovanhu mOnghalo i li Xwepo nola tofwa ongoshimwe shomoilalakanenwa itatu ya denga mbada mokukaleka ovanhu monghalo i li xwepo. Okuhena nhondo oku taku holola ediladilo lokupameka nekanghameno lokuhatongola. Oinima tai shikula: Okufikepamwe wopaukakwashikookonhu, (Oshilalakanenwa shOkukaleka Ovanhu mOnghalo I li Xwepo 5), Eshunifopedu lokuhafikepamwe (Oshilalakanenwa shOkukaleka Ovanhu mOnghalo I li Xwepo 10), Ombili, Ouyyuki, nOmikangha da kola (Oshilalakanenwa shOkukaleka Ovanhu mOnghalo i li Xwepo 16) oyo imwe tai kwatafana filufilu nokuhenanhondo nepameko lovanhu. Hauxuuninwa, oufikepamwe ile okuhafikapamwe ongoshidiladilwanima owa yelifwa nawa mEfaneko lomudo 2030. Oshinima shi li ngaha otashi holoka mOshilalakanenwa shOkukaleka Ovanhu mOnghalo I li Xwepo 10 osho tashi lalakanene okushunifa pedu okuhafikepamwe meni loshilongo nopokati koilongo nosha kwatelwa mo puhe shi meukililo moilalakanenwa ikwao noishonekwa ikwawo mEfaneko alishe ngaashi oundjolowele, elongo, oukashikekookanhu naimwe.

Oishonekwa ihapu i li momukangha wOilalakanenwa yOkukaleka Omunhu mOnghalo I li Xwepo otai kwatafana nokuyandja eemhito, okupameka nokutaneka onghalo yonghalafano nomahupilo opo ovanhu va xume komesho. Unene oishonekwa ya pamba elongo laaveshe lopondodo yopedu noyopombada, okushiiva okulesha nokushanga nokuvalula (Oshilalakanenwa shOkukaleka Ovanhu mOnghalo I li Xwepo 4); okufya oshisho opo ovakainhu va kufe ombinga kuyadi nova mone eemhito di da faafana novalumenhu momawiliko peendodo adishe dokuninga omatokolo kashi nee kutya omopolitika, momaxupilo nomepangelo (Oshilalakanenwa shOkukaleka Ovanhu mOnghalo I li Xwepo 5); okufya oshisho opo pa kale omatokolo taa ningwa she likolelela keemhumbwe, taa kwatele mo ovanhu aveshe, taa pitika ovanhu aveshe va kufe ombinga nova kwatelwe mo (Oshilalakanenwa shOkukaleka Ovanhu mOnghalo I li Xwepo 10); okukala pe na omhito yokumona omayakulo opaundjolowele oilyo yoidalifi nomahakulo e na sha noufemba nokumona ounona (Oshilalakanenwa shOkukaleka Ovanhu mOnghalo I li Xwepo 3); oilonga iwa notai eta po sha (Oshilalakanenwa shOkukaleka Ovanhu mOnghalo I li Xwepo 8)nehapupalo lounongo opo omunhu a mone oilonga noku ninge ongeshefa(Oshilalakanenwa shOkukaleka Ovanhu mOnghalo I li Xwepo 9). Oinima aishe ei oyo ya fimana neenghono mEfaneko lokukaleka Ovanhu monkalo i li xwepo IOiwanahangano lomudo 2030 olo Ohamba Meekulu Martha Mwadinomho yaKristian Nelumbu okwa holola elama laye e shi a ninga naanaa momhepo youmwainafana yomunwe umwe ihaa u litoola na newiliko la kwatela mo ovanhu aveshe. Naunene tuu, Meekulu Mwadinomho okwa kendabala okukala e na oshilonga mokudana onghandangala mokuxumifa komesho ehongo (Oshilalakanenwa shOkukaleka Ovanhu mOnghalo I li Xwepo-elongo longushu 4) okudja koshikunino ndee fiyo okouniversiti molwovalelwa vaye. Ehongo olo oshilongifo sha fimana mokuhanga onghalo i li xwepo osheshi olo oshilalakanenwa noshilongifo shokuhanga Oilalakanenwa imwe ayishe yOkukaleka Omunhu mOnghalo I li hwepo. Mokupameka ovanyasha opo va mone ehongo, Ohamba Martha Mwadinomho yaKristian Nelumbu otai lu oita yokukondjifa oluhepo komukalo keshe. Pamukalo u li ngaha, oluhepo oli dulife po pomhumbwe yoimaliwa needjo odo da pumbiwa mokukaleka omunhu monghalo i li xwepo. Ohali liholola mondjala, momanyutu,melongo lihe po nawa nomomayakulo opetindi, okuningwa okayova nokupatelwa pondje nosho yo omhumbwe yokuninga omatokolo (UN,2018) nomoinima ya kuma onghalamwenyo yomunhu. Oshiputudilo shedina NUST okupitila mOshikandjo shOipindi, Onghalafano yopanhu nElongo osha tala kutya Ohamba yOvakwanyama Meekulu Martha Mwadinomho yaKristian Nelumbu oi na oukwatya wokutokola okulonga osho sha yuka noyi na yo omhepo yokuhelihola mokupameka nokuhumifa komesho ovaalelwa vayo. Nonande



okwa dja monghalo ya nyika oufyoona konduko, Meekulu Martha Mwadinomho yaKristian Nelumbu okwa yandja oshihopanenwa shiwa kOvakwanyama aveshe nokovanhu vamwe ve li pamwe pe lili eshi a twa ovanhu omukumo va longele oshiwana oshali, ve liyambe nova kale ovakwashiwana va nuka po. MEtalalalinini 2015, okwa ninga eindilo la mana mo kutya ovakainhu ovanyasha Ovanamibia inave li kufa va li omadimo nokudipaa eehanana dihe na etimba noku di kupulashi ndele nee nave di ete kOuhamba waye.

## 9. EXULIFO NEULIKO LANAKUPEWA ONGHATU YOUNDOKOTOLA WEFIMANEKO

Onghee nee, she li kolelela komilandumhango, Eeveta nOmaufo, e li mEtukulwa 2(2.1) [a)-(c) epandja 45. ; Ouniversiti oyi na eenghono dokuyandja Onghatu yOundokotola wEfimaneko kovaulikwa ovo va wanifa po oipumbiwa aishe ngaashi sha ufwa. Omaufo aa okwa kwatela mo oumbangi tawu holola poluhaela kutya omunhu okwa yandja eyakulo la fimana mokuxumifa komesho oshitai keshe shelihongo nenge pe na ehokololo tali ulike kutya okwa yakula oshiwana neenghono ile a longo oilonga ya talika kouniversiti ya wana oku mu fimanekifa moshiwana noya kwatela mo i) eyakulo lomufika wopombada la ningilwa oshiwana moimhungulonga ngaashi ewiliko liwa, omufyuuluwakalo, okuyambula po oshiwana, opolotika, elongo, nomaxupilo. Omunhu oo ta ulikwa a pewe onghatu yefimaneko na kale e na oukwatya oo kutya okupewa onghatu yefimaneko otaku fimanekifa ouniversiti noitau kondjifa, ondungefaneko, oshilalakanenwa neenghedinghalelo doUniversiti. Onghee mokukwafela mokuyambidida oshilalakanenwa sha shiya ko sha-NUST shokuhanga Ovanamibia aveshe tashi pitile momikalo dihapu dokulalakanena ehonga la denga mbada, omashitililokonakono okukandula po omikundu, okulongifa omikalo dipe nomayakulo mekwatafano novakufimbanga [Oshilalakanenwa shOkukaleka Ovanhu mOnghalo i li Xwepo4]; ***Ohamba Meekulu Martha Mwadinomho yaKristian Nelumbu yElelo lopamufyuuluwakalo IOvakwanyama nomuwiliki woshitunda moshiwana shaNamibia okwa holola elipakemo nehala laye mokuyambidida Ovanamibia va kandule po omaudjuu nomaunghudi mahapu moshiwana shaNamibia tashi pitile mokuyakula oshali, okuliyamba nokufimaneka ovanhu vakwao nopamukalo ou oya xumifa komesho ounhu womunhu neenghono.***

Nonando Meekulu Martha Mwadinomho yaKristian yaNelumbu okwa dja monghalo ya nyika oufyoona konduko, okwa longa oilonga iwa oyo tai dulu okulihongwa kepupi lopaife. Eshi otashi holola elumbakano leenghedinghalelo dopamufuuluwakalo nonghalo yoshinanena -ngashi she liholola

mOmifyuululwakalo dOshikwanyama. Onghalamwenyo yOhamba Meekulu Martha otai kondjifa omahokololo oo a dama meitavelo, meenghedi nomomikalo dokutya ovalumenhu ovo kadenga mokuyakula onghee ou oumbangi kutya ovakainhu otava dulu okuxumifa komesho oiwana yomu Afrika. Onghalamwenyo yOhamba Meekulu Martha otai holola osho elumbakano lelixupipiko nohole yoshiwana tai dulu okushakenifa moshiwana shetu. Monkalamwenyo yaye ayishe okwa longa nokutwa ovanhu omukumo va yakule oshali, ve liyambele oshiwana nokukala oshiwana sha nuka po, omikalo odo tadi kana tadi endebele momufyuululwakalo wa Afrika. Oshikwao onghalamwenyo ya Meekulu Martha Mwadinomho oya ulika elipakemo lakula nexwamo lakula kuhe na vali; okulihumbata nelixupipiko, okuliudila ounhwa nokukala nomukumo nonande pe na omautondwe nomaudjuu monghalamwenyo, okufimaneka ovaneumbo osheshi ovo ongudi ya fimana oyo tai tungu po oshiwana nomukangha weputuko letu; okufimaneka ondilo nouwa wonghalamwenyo nokukendabala u i keele kouwi noku i amena; okukwatela komesho omalunduluko oo wa hala a holoke mounyuni; okukala nombili novanhu ovo to longo navo, ndele ino pitika ve ku longife ngaashi va hala; okulela oshiwana oshilixupipiki okwa pumbwa okulixupipika; okuxupa mefimbo lomaudjuu noiponga yopaushitwe okwa pumbwa okulonga noudiinini nokupungula oikulya wa ningila eedjuba dokomangula.

**Omufimanekwa,** omukulunhu woshiputudilo eshi, omuhongwa wetu okwa longa tau pu mo mokuxumifakomesho oshiwana, mwa kwatelwa ehongo longushu yaaveshe nokudenga omufindo mehongo lihe na edimbuko nohole yokuhola oshiwana (Oshilalakanenwa shOkukaleka Ovanhu mOnghalo i li Xwepo). Omuhongwa wetu okwa longa oilonga yakula mokukwatela po ouyuuki moshiwana, okumangulula ovanhu pamaxupilo nokuxumifa komesho omaxupilo moshilongo shetu. Omolwoshiwana osho sha tomhwa noshu uditile etumba oilonga oyo ya longwa kOhamba, nena ohatu yandje efimaneko hakomuwiliki ashike wopamufyuululwakalo ndee okomunhu a fimana moshiwana ashishe eshi e shi pondola mokulonga oilonga ya denga mbada. Omufimanekwa omukulunhu woshiputudilo pamapopilo yokakomitiye kokuyandja omapapa, olutuwiliki lolaata yoUniversiti yedina The Namibia University of Science and Technology (Ouniversiti yoUnongononi nOikwamashina yopaunongononi, Ohamba Meekulu Martha Mwadinomho yaKristian Nelumbu, omuleli welelo lopamufyuululwakalo lOvakwanyama ohandi ku pe Oundokotola woufilosofi, wonghatu yefimaneko mOuleli nomOkukwatela komesho Omalunduluko.

Tangi unene



010

Qhamba yGqakwanyama  
Mandume  
Ndeulkula ya Ndemufayo

Boled from 1911 - 1917

and Fighted a Brutal War Against  
the Portuguese  
in the  
Army



## 10. EEDJO/OMISHANGWAYAMBIDIDI

- Ndilula, N. [2024]. ***Meekulu Martha Mwadinomho ya Kristian Nelumbu***. Unpublished. Ohangwena.
- Nghiishililwa, F. [2024]. ***Meekulu Martha Mwadinomho ya Kristian Nelumbu***. Unpublished. Ohangwena.
- Nghiyoonanye, T. [2024]. ***Meekulu Martha Mwadinomho ya Kristian Nelumbu***. Unpublished. Ohangwena.
- Udjombala, J. [2024]. ***Meekulu Martha Mwadinomho ya Kristian Nelumbu***. Unpublished. Ohangwena.
- Ya Nghilundilwa, E. [2024]. ***Meekulu Martha Mwadinomho ya Kristian Nelumbu***. Unpublished. Ohangwena.
- Ya Weyulu, O. [2024]. ***Meekulu Martha Mwadinomho ya Kristian Nelumbu***. Unpublished. Ohangwena.

## 11. EEDJO

- Addadzi-Koom, M. E., Addaney, M., & Nkansah, L. A. [2022]. The Fourth Republic and 1992 Constitution of Ghana: Grounding Democracy, Rule of Law and Development. In *Democratic Governance, Law, and Development in Africa: Pragmatism, Experiments, and Prospects* (pp. 3-35). Cham: Springer International Publishing.
- Angula, N., & Semente, E.M.M [2024]. The role of Traditional Authorities in governance and Economic sustainability in Namibia [Unpublished]
- Angula, N., Randa, I., & Semente, E.M.M [2024]. Namibia attaining Independence, economic emancipation, and social justice [Unpublished]
- Baldwin, K., & Holzinger, K. [2019]. Traditional political institutions and democracy: Reassessing their compatibility and accountability. *Comparative Political Studies*, 52(12), 1747-1774.
- Government Republic of Namibia [2000]. *Traditional Authorities Act 25 of 2000*, Windhoek: Government Press.
- Grint, K. [2010]. Wicked problems and clumsy solutions: the role of leadership. In *The new public leadership challenge* (pp. 169-186). London: Palgrave Macmillan UK.
- Gunderson, L. H., & Light, S. S. [2006]. Adaptive management and adaptive governance in the everglades ecosystem. *Policy Sciences*, 39(4), 323–334.
- Head, B. W. [2022]. Political Governance of Wicked Problems. In *Wicked Problems in Public Policy: Understanding and Responding to Complex Challenges* (pp. 37-60). Cham: Springer International Publishing.



- Janeczko, L. S. (2011). Managing wicked policy problems: A case for deliberative practices (Doctoral dissertation, Murdoch University).
- Naime, M. (2020). Defining wicked problems for public policy: The case of Mexico's disappearances. *Gestión y Análisis de Políticas Públicas*, (23), 64-80.
- Pérez-Escamilla, R. (2017). Food security and the 2015–2030 sustainable development goals: From human to planetary health: Perspectives and opinions. *Current developments in nutrition*, 1(7), e000513.
- Randa, I., & Semente, E.M.M. (2024). Traditional Authorities and SDGs. (Unpublished)
- Roberts, N. C. (2000). Wicked problems and networks approaches to resolution. *International Public Management Review*, 1(1), 1–19.
- Sachs, J. D., Kroll, C., Lafortune, G., Fuller, G., & Woelm, F. (2022). Sustainable development report 2022. Cambridge University Press.
- Shantz, A., Sayer, M., Byrne, J., & Dempsey-Brench, K. (2023). Grand Challenges and the MBA. *Journal of Management Education*, 47(3), 292-323.
- Shiweda, N. (2011). Omhedi : Displacement and Legitimacy in Oukwanyama Politics, Namibia 1915-2010. x+275.
- Termeer, C. J., Dewulf, A., & Biesbroek, R. (2019). A critical assessment of the wicked problem concept: relevance and usefulness for policy science and practice. *Policy and Society*, 38(2), 167-179.
- Torfing, J., Peters, B. G., Pierre, J., & Sorensen, E. (2012). Interactive Governance. Advancing the paradigm. Oxford: Oxford University Press.
- Traditional-Authorities-Act-2000.pdf. (n.d.).
- United Nations (2018), The 2030 Agenda and the Sustainable Development Goals: An opportunity for Latin America and the Caribbean [LC/G.2681-P/Rev.3], Santiago.
- Ubink, J. (2008). Traditional authorities in Africa: Resurgence in an era of democratisation. Leiden University Press.
- Van Bueren, E. M., Klijn, E. H., & Koppenjan, J. F. M. (2003). Dealing with wicked problems in networks: Analyzing an environmental debate from a network perspective. *Journal of Public Administration Research & Theory*, 13(2), 193.
- Wig, T. (2016). Peace from the past: Pre-colonial political institutions and civil wars in Africa. *Journal of Peace Research*, 53(4), 509-524.



NBC- Digital News: <https://www.facebook.com/photo/>



**NAMIBIA UNIVERSITY  
OF SCIENCE AND TECHNOLOGY**

**Epapa Iefimaneke**

Office of the Registrar  
Private Bag 13388  
Windhoek  
NAMIBIA

T: +264 61 207 2118  
E: [registrar@nust.na](mailto:registrar@nust.na)  
W: [www.nust.na](http://www.nust.na)